

**ZAPISNIK O RADU 18. SJEDNICE  
GRADSKOG VIJEĆA GRADA SARAJEVA  
ODRŽANE 25.07.2018. GODINE U VIJEĆNICI**

Broj: 01-GV-02-864/18

Datum: 25.07.2018. godine

Sjednica je počela s radom u 10.00 sati.

Sjednicom je predsjedavao **Dr. Igor Gavrić, predsjedavajući Gradskog vijeća.** Prisutni su bili sljedeći gradski vijećnici:

- |                            |                         |
|----------------------------|-------------------------|
| 1. Bajro Biber             | 15. Snežana Omukić      |
| 2. Mr. Vedad Deljković     | 16. Mr. Srđan Simonović |
| 3. Vedran Dodik            | 17. Srđan Srdić         |
| 4. Mr. Tea Mušić           | 18. Mr. Sead Srna       |
| 5. Samir Fazlić            | 19. Adnan Talić         |
| 6. Edina Gabela            | 20. Nihad Uk            |
| 7. Dr. Igor Gavrić         | 21. Lana Velić          |
| 8. Nuko Grebović           | 22. Toni Vukadin        |
| 9. Mr. Vibor Handžić       |                         |
| 10. Sanela Holjan          |                         |
| 11. Mira Jurić             |                         |
| 12. Prof.dr. Velija Katica |                         |
| 13. Miro Lazović           |                         |
| 14. Almedin Miladin        |                         |

Odsutni: Adnan Gušo, Dado Stojnić, Barbara Peleš Stroil, Mr. Hazim Bahtanović, Reuf Hafizović (najavljeni izostanci).

Pored gradskih vijećnika, sjednici su prisustvovali:

1. Mr. Abdulah Skaka, Gradonačelnik
2. Milan Trivić, zamjenik Gradonačelnika,
3. Ivica Šarić, zamjenik Gradonačelnika,
4. Sanjin Smajlović, pravobranilac Grada Sarajeva
5. Safet Krajišnik, sekretar Gradskog vijeća,
6. Amela Kolovrat, pomoćnik Gradonačelnika za finansije,
7. Dragana Solaković, pomoćnik Gradonačelnika za lokalnu samoupravu i razvoj grada,
8. Subha Krajišnik, pomoćnik Gradonačelnika za opću upravu i zajedničke poslove,
9. Elvir Hadžiahmetović, pomoćnik Gradonačelnika za evropske integracije i EU fondove
10. Nedim Tvrtković, pomoćnik Gradonačelnika za urbano planiranje, investicije, stambene i komunalne poslove
11. Amina Deljković, pomoćnik Gradonačelnika za obrazovanje, kulturu, sport i mlade
12. Maja Hadžihalilović, rukovodilac Stručne službe Gradonačelnika

13. Članovi Komisije za Statut i akte koji nisu gradski vijećnici (prema evidenciji u Gradskoj službi za Gradsko vijeće)

**Predsjedavajući Gradskog vijeća Igor Gavrić** je pozdravio prisutne gradske vijećnike i goste i otvorio **18. sjednicu Gradskog vijeća Grada Sarajeva**, konstatacijom da sjednici prisustvuje **20** gradskih vijećnika, te da su izostanak najavili gradska vijećnica Barbara Peleš Stroil, gradski vijećnik Hazim Bahtanović, gradski vijećnik Adnan Gušo i gradski vijećnik Dado Stojnić, a kašnjenje su najavili, gradski vijećnik Miroslav Živanović i gradski vijećnik Srđan Srdić.

\*\*\*

Na poziv **Predsjedavajućeg Gradskog vijeća Igora Gavrića, Gradsko vijeće Grada Sarajeva, bez rasprave, jednoglasno**, izjasnivši se sa 19 glasova “za”, bez glasova “protiv” i bez “suzdržanih” glasova prisutnih gradskih vijećnika (dva gradska vijećnika se nisu izjasnila), usvojilo je Zapisnik o radu 17. sjednice Gradskog vijeća Grada Sarajeva održane 27.06.2018. godine.

\*\*\*

**Predsjedavajući Gradskog vijeća Igor Gavrić** je podsjetio gradske vijećnike da su, uz predloženi dnevni red sjednice, dostavljeni materijali gradskim vijećnicima, zajedno sa saglasnostima zamjenika Gradonačelnika.

Podsjetio je da je kako je to i programirano, gradskim vijećnicima kao informativni materijal, dostavljen i Izvještaj Gradonačelnika o korištenju sredstava tekuće rezerve.

Upoznao je Gradske vijećnike da je Gradonačelnik, u međuvremenu, uputio na razmatranje po **hitnom postupku** Prijedlog Odluke o davanju saglasnosti za produženje mandata vršioca dužnosti predsjednika i članova Skupštine Javnog preduzeća „Olimpijski bazen Otoka“ d.o.o. Sarajevo, te da je ovaj prijedlog dostupan gradskim vijećnicima kao naknadno upućen materijal. Zatim je najavio određivanje o aktima koji su predloženi za razmatranje u formi prijedloga, po proceduri koja zahtjeva izjašnjavanje Gradskog vijeća o prethodnom pitanju, a zatim je **Pomoćnik Gradonačelnika za opću upravu i zajedničke poslove Subha Krajišnik**, u ime Predlagača obrazložila razloge za predlaganje teme po hitnom postupku.

\*\*\*

Na poziv **Predsjedavajućeg Gradskog vijeća Igora Gavrića, Gradsko vijeće Grada Sarajeva, bez rasprave, većinom glasova**, izjasnivši se sa 16 glasova “za”, bez glasova “protiv” i uz pet “suzdržanih” glasova prisutnih gradskih vijećnika, usvojilo je prijedlog da se Odluka o izmjenama i dopunama Odluke o pristupanju izradi Regulacionog plana “Reljevo”, razmatra u formi prijedloga po skraćenom postupku.

\*\*\*

Na poziv **Predsjedavajućeg Gradskog vijeća Igora Gavrića, Gradsko vijeće Grada Sarajeva, bez rasprave, jednoglasno**, izjasnivši se sa 20 glasova “za”, bez glasova “protiv” i bez “suzdržanih” glasova prisutnih gradskih vijećnika (jedan gradski vijećnik se nije izjasnio), usvojilo je prijedlog da se Odluka o davanju saglasnosti na Nagodbu u pravnoj stvari tužitelja City Mark Plus d.o.o. Sarajevo protiv tuženog Grada Sarajeva, razmatra u formi prijedloga po skraćenom postupku.

\*\*\*

Na poziv **Predsjedavajućeg Gradskog vijeća Igora Gavrića, Gradsko vijeće Grada Sarajeva, bez rasprave**, izjasnivši se sa 12 glasova “za”, dva glasa “protiv” i uz pet “suzdržanih” glasova

prisutnih gradskih vijećnika (dva gradska vijećnika se nisu izjasnila), nije usvojilo prijedlog da se Odluka o davanju saglasnosti za produženje mandata vršioca dužnosti predsjednika i članova Skupštine Javnog preduzeća „Olimpijski bazen Otoka“ d.o.o. Sarajevo, razmatra u formi prijedloga po hitnom postupku.

\*\*\*

Na poziv **Gradonačelnika Abdulaha Skake, Gradsko vijeće Grada Sarajeva je odalo počast** preminuloj predsjednici Udruženja “Majke Srebrenice” **Hatidži Mehmedović**.

\*\*\*

Zatim je **Gradonačelnik Abdulah Skaka** obrazložio i iznio prijedlog da Gradsko vijeće na ovoj sjednici po hitnom postupku razmatra Prijedlog Odluke o davanju imena česmi u Općini Stari Grad, ulica Terzibašina broj 1, Hatidža Mehmedović.

\*\*\*

Na poziv **Predsjedavajućeg Gradskog vijeća Igora Gravrića**, uslijedila je pauza u radu Gradskog vijeća u kojoj je održana sjednica Kolegija Gradskog vijeća.

\*\*\*

Sjednica je nastavila s radom tako što je, na poziv **Predsjedavajućeg Gradskog vijeća Igora Gavrića, Gradsko vijeće Grada Sarajeva**, bez rasprave, jednoglasno, izjasnivši se sa 19 glasova “za”, bez glasova “protiv” i bez “suzdržanih” glasova prisutnih gradskih vijećnika (dva gradska vijećnika se nisu izjasnila), usvojilo prijedlog da se Odluka o davanju imena česmi u Općini Stari Grad, ulica Terzibašina broj 1, Hatidža Mehmedović razmatra u formi prijedloga po hitnom postupku.

\*\*\*

Bez dalje rasprave, na poziv **Predsjedavajućeg Gradskog vijeća Igora Gavrića, Gradsko vijeće Grada Sarajeva, jednoglasno**, izjasnivši se sa **19** glasova “za”, bez glasova “protiv” i bez “suzdržanih” glasova prisutnih gradskih vijećnika (tri gradska vijećnika se nisu izjasnila), za 18. sjednicu Gradskog vijeća Grada Sarajeva, usvojilo je sljedeći dnevni red:<sup>1</sup>

1. **Prijedlog Odluke o davanju imena česmi u Općini Stari Grad, ulica Terzibašina broj 1, Hatidža Mehmedović**
2. **Prijedlog Odluke o izmjenama i dopunama Odluke o pristupanju izradi Regulacionog plana “Reljevo”**
3. **Prijedlog Odluke o usvajanju Regulacionog plana “Rajlovac III” s Prijedlogom Odluke o provođenju Regulacionog plana “Rajlovac III”**
4. **Prijedlog Odluke o davanju saglasnosti na Nagodbu u pravnoj stvari tužitelja City Mark Plus d.o.o. Sarajevo protiv tuženog Grada Sarajeva**
5. **Informacija o realizaciji vijećničkih pitanja i inicijativa za tekuću godinu**
6. **Vijećnička pitanja i inicijative**

**Ad 1)**

**Prijedlog Odluke o davanju imena česmi u Općini Stari Grad, ulica Terzibašina broj 1, Hatidža Mehmedović**

U uvodnim napomenama **Predsjedavajući Gradskog vijeća Igor Gavrić** podsjetio je gradske vijećnike da je predlažak akta Gradonačelnik, te da se odluka razmatra po hitnom postupku.

Na poziv **Predsjedavajućeg Gradskog vijeća Igora Gavrića, Gradsko vijeće Grada Sarajeva, jednoglasno**, izjasnivši se sa 21 glasom “za”, bez glasova “protiv” i bez “suzdržanih” glasova prisutnih gradskih vijećnika (jedan gradski vijećnik se nije izjasnio), usvojilo je Odluku o davanju imena česmi u Općini Stari Grad Sarajevo, ulica Terzibašina broj 1, Hatidža Mehmedović kako je predložena.

#### **Ad 2)**

#### **Prijedlog Odluke o izmjenama i dopunama Odluke o pristupanju izradi Regulacionog plana “Reljevo”**

U uvodnim napomenama **Predsjedavajući Gradskog vijeća Igor Gavrić** podsjetio je gradske vijećnike da je predlagač akta Gradonačelnik te da su, uz predloženu odluku, dostavljeni i izvještaji Odbora za urbanizam i upotrebu lokalnog zemljišta i Komisije za Statut i akte.

Uvodno izlaganje je podnijela **Arijana Musić, šef Odsjeka za urbano planiranje.**

U raspravi je sudjelovao **gradski vijećnik Vibor Handžić**, a odgovore na pitanja i dodatna obrazloženja dala je **Arijana Musić, šef Odsjeka za urbano planiranje.**

Na poziv **Predsjedavajućeg Gradskog vijeća Igora Gavrića, Gradsko vijeće Grada Sarajeva, većinom glasova**, izjasnivši se sa 15 glasova “za”, tri glasa “protiv” i uz dva “suzdržana” glasa prisutnih gradskih vijećnika (jedan gradski vijećnik se nije izjasnio), usvojilo je Odluku o izmjenama i dopunama Odluke o pristupanju izradi Regulacionog plana “Reljevo” kako je predložena.

#### **Ad 3)**

#### **Prijedlog Odluke o usvajanju Regulacionog plana “Rajlovac III” s Prijedlogom Odluke o provođenju Regulacionog plana “Rajlovac III”**

U uvodnim napomenama **Predsjedavajući Gradskog vijeća Igor Gavrić** podsjetio je gradske vijećnike da je predlagač akta Gradonačelnik te da su, uz predloženu odluku, dostavljeni i izvještaji Odbora za urbanizam i upotrebu lokalnog zemljišta i Komisije za Statut i akte.

Uvodno izlaganje je podnijela **Arijana Musić, šef Odsjeka za urbano planiranje.**

U raspravi je sudjelovao **gradski vijećnik Vibor Handžić.**

Na poziv **Predsjedavajućeg Gradskog vijeća Igora Gavrića, Gradsko vijeće Grada Sarajeva, većinom glasova**, izjasnivši se sa 18 glasova “za”, bez glasova “protiv” i uz dva “suzdržana” glasa prisutnih gradskih vijećnika (dva gradska vijećnika se nisu izjasnila), usvojilo je Odluku o usvajanju Regulacionog plana “Rajlovac III” s Odlukom o provođenju Regulacionog plana “Rajlovac III” kako je predložena.

#### **Ad 4)**

#### **Prijedlog Odluke o davanju saglasnosti na Nagodbu u pravnoj stvari tužitelja City Mark Plus d.o.o. Sarajevo protiv tuženog Grada Sarajeva**

U uvodnim napomenama **Predsjedavajući Gradskog vijeća Igor Gavrić** podsjetio je gradske vijećnike da je predlagač akta Gradonačelnik, te da je, uz predloženu odluku, dostupan i izvještaj Komisije za Statut i akte.

Uvodno izlaganje je podnio **pravobranilac Grada Sarajeva Sanjin Smajlović**.

U raspravi su svoja mišljenja, stavove, sugestije, odnosno pitanja uputili **gradska vijećnica Snežana Omukić, gradski vijećnik Nihad Uk, gradski vijećnik Samir Fazlić, gradski vijećnik Nuko Grebović**, a dodatna obrazloženja i odgovore na pitanja, u ime predlagača davao je **pravobranilac Grada Sarajeva Sanjin Smajlović**, a zatim i **Gradonačelnik Abdulah Skaka**.

Na poziv Predsjedavajućeg Gradskog vijeća Igora Gavrića, **Gradsko vijeće Grada Sarajeva, većinom glasova**, izjasnivši se sa 19 glasova “za”, bez glasova “protiv” i uz dva “suzdržana” glasa prisutnih gradskih vijećnika, usvojilo je **Odluku o davanju saglasnosti na Nagodbu u pravnoj stvari tužitelja City Mark Plus d.o.o. Sarajevo protiv tuženog Grada Sarajeva kako je predložena**.

#### **Ad 5)**

##### **Informacija o realizaciji vijećničkih pitanja i inicijativa za tekuću godinu**

U uvodnim napomenama **Predsjedavajući Gradskog vijeća Igor Gavrić** podsjetio je gradske vijećnike da je informaciju podnio Gradonačelnik.

**Predsjedavajući Gradskog vijeća Igor Gavrić** je konstatirao da je **Gradsko vijeće Grada Sarajeva**, bez rasprave, primilo k znanju **Informaciju o realizaciji vijećničkih pitanja i inicijativa za tekuću godinu kako je podnesena**.

#### **Ad 6)**

##### **Vijećnička pitanja i inicijative**

**Predsjedavajući Gradskog vijeća Igor Gavrić** je najavio razmatranje vijećničkih pitanja i inicijativa i to najprije onih dostavljenih u pisanoj formi uz poziv za sjednicu.

##### **1. Gradski vijećnik Igor Gavrić, predsjedavajući Gradskog vijeća, uputio je inicijativu kako slijedi.**

“JP Televizija Kantona Sarajevo, d.o.o. se obratila Gradskom vijeću Grada Sarajeva molbom za finansijsku pomoć pri realizaciji dokumentarnog filma „Keli“, filma o Želimiru Vidoviću Keliju, koji se spominje kao jedna od najvećih legendi, kako u sportskom, tako i u ljudskom smislu, koje su grad i FK „Sarajevo“ ikada imali. Poginuo je u humanoj misiji, prevozeći ranjenike iz sarajevskog naselja Dobrinja prema bolnici Koševo 1992. godine.

Molba je u prilogu ove inicijative.

Upućuje se inicijativa Gradonačelniku da razmotri molbu JP Televizija Kantona Sarajevo, d.o.o. s ciljem određivanja o mogućoj finansijskoj podršci Grada Sarajeva projektu snimanja dokumentarnog filma „Keli“, putem pokroviteljstva Grada Sarajeva ili na drugi način, u visini od 5.000,00KM.

Pozivam gradske vijećnike da razmotre inicijativu i daju joj podršku kako bi postala inicijativom Gradskog vijeća.

##### Obrazloženje

Dokumentarni film autora Muhameda Bikića, novinara i publiciste, čije snimanje priprema JP TVSA, ispričat će priču o životu Želimira Vidovića Kelija, legendarnog nogometaša Sarajeva i reprezentativca bivše Jugoslavije koji je ubijen 1992. godine u humanoj misiji spašavanja ranjenika iz naselja Dobrinja. Životna priča Kelija će biti ispričana prema kazivanjima njegovih

najbližih, prijatelja, suigrača i sugrađana suvremenika, a vezano za ljude, događaje i mjesta koji su zajedno s njim, obilježili Sarajevo.

Udruženje “Bordo prijatelji 1946” je o Želimiru Vidoviću Keliju napisalo:

“Želimir Vidović Keli je fudbalska i ljudska legenda grada Sarajeva.

Rođen je 17.11.1953. godine u Sarajevu, gdje je u plemenitoj misiji i izgubio život 17.5.1992. godine, za vrijeme posljednjeg rata.

Svoju nogometnu karijeru je započeo u sarajevskoj Bosni, a za prvi tim FK “Sarajevo” debitirao je 14.8.1974. godine. U devet sezona je branio boje kluba 241 put. Želimir Vidović Keli je svojim maestralnim igrama u dresu Fudbalskog kluba “Sarajevo” zaslužio poziv i u državni tim Jugoslavije.

U bordo dresu je odigrao i svojim virtuosnim nogometnim umijećem, rješavao neke od najvećih utakmica koje ovaj grad uopće pamti, poput gradskog derbija u martu 1982. godine pred 55.000 gledalaca, što je nikad ponovljen rekord grada Sarajeva; utakmice kupa UEFA, te nesretno izgubljeno finale kupa Maršala Tita.

Svoju profesionalnu fudbalsku karijeru Vidović je zaključio igrajući za austrijski GAK, a potom se vratio u voljeni rodni grad. Po okončanju profesionalne igračke karijere radi kao trener u FK “Novi Grad”, sadašnja FK “Dobrinja.”

Želimir Vidović Keli kao fudbaler ostaće upamćen po svojoj bezgraničnoj plemenitosti, rijetkom i čudnovatom spoju elegancije i požrtvovanosti na terenu.

A kako je “igrao lopte” Keli je upravo tako i živio, nesebično dajući sebe za svoj grad i sugrađane.

U najtežim trenucima po grad Sarajevo, u proljeće 1992. godine, Keli je bio i ostao tamo gdje je cijeli život pripadao. Opsada Sarajeva zatekla ga je na Dobrinji. Kao istinska sportska i ljudska gromada 17.5.1992. godine Keli je vozilom Hitne pomoći između neprijateljskih punktova, u misiji spašavanja života, prebacio u grad četiri najteža dobrinjska ranjenika. Na povratku u Dobrinju, gdje je žurio kako bi nastavio spašavati živote svojih sugrađana, kola Hitna pomoći kojima je upravljao, zaustavljena su na neprijateljskom punktu, a velikom čovjeku Želimiru Vidoviću Keliju gubi se svaki trag.

Potruga za njegovim tijelom trajala je punih 12 godina. Petog juna 2004. godine na gradskom groblju Bare, pokopani su posmrtni ostaci legendarnog fudbalera i čovjeka Želimira Vidovića Kelija. Prema izričitoj želji porodice, Keli je pokopan u dresu FK Sarajevo, kluba i grada za kojeg je živio i stradao.

Danas jedna ulica u Sarajevu na Dobrinji, nosi njegovo ime, kao i teren u trening kampu FK “Sarajevo” na Butmiru, a svake godine se organizira fudbalski turnir u čast Želimira Vidovića Kelija.

Ono što Sarajevo, mali grad po svim statističkim kriterijima na evropskoj mapi prijestolnica, čini velikim i prepoznatljivim su upravo ljudi poput Želimira Vidovića Kelija koji daju taj jedinstveni pečat, sarajevski duh, po kome Sarajevo nadmašuje svoju objektivnu veličinu i naš grad čini jedinstvenim i posebnim.

Zbog takvih ljudi se ovaj grad i voli.

Grad Sarajevo i njegovi građani ostaće vječni dužnici Želimiru Vidoviću Keliju”, poručili su Bordo prijatelji.“

Na poziv **Predsjedavajućeg Gradskog vijeća Igora Gavrića, Gradsko vijeće Grada Sarajeva, većinom glasova**, izjasnivši se sa 19 glasova “za”, bez glasova “protiv” i uz jedan “suzdržan” glas prisutnih gradskih vijećnika (jedan gradski vijećnik se nije izjasnio), podržalo je podnesenu inicijativu, te je ona postala inicijativom Gradskog vijeća i upućuje sa nadležnim organima.

2. **Kolegij Gradskog vijeća** uputio je **inicijativu** da Gradsko vijeće svojim zaključkom uputi apel određenim subjektima za provođenje kontinuirane kampanje vezane za sigurnost u prometu.

Na poziv **Predsjedavajućeg Gradskog vijeća Igora Gavrića**, **Gradsko vijeće Grada Sarajeva**, **jednoglasno**, izjasnivši se sa 19 glasova “za”, bez glasova “protiv” i bez “suzdržanih” glasova prisutnih gradskih vijećnika (jedan gradski vijećnik se nije izjasnio), podržalo je prijedlog i usvojilo sljedeći **zaključak**:

**Grad Sarajevo upućuje apel nadležnima u Kantonu Sarajevo, ali i lokalnim zajednicama i javnim medijskim servisima da poduzmu aktivnosti, u okviru svog djelokruga i raspoloživih mogućnosti, kojima će se kontinuirano, u dužem periodu, voditi snažna kampanja, s ciljem podizanja svijesti o neophodnosti jačanja odgovornosti svih učesnika u saobraćaju i svijesti o teškim i trajnim posljedicama koje mogu nastati zbog neodgovornih postupaka svih subjekata.**

3. **Klub Gradskih vijećnika SBB** uputio je **inicijativu** kako slijedi.

„Klub SBB-a pokreće inicijativu, te zahtjeva da se ista brzo realizuje, da se nađu sredstva za rješenje mogućnosti pristupa invalidima Trebevičkoj žičari.

Kao moguće rješenje Klub SBB-a predlaže izgradnju ravnog eskalatora.

Obrazloženje

Poznato je da je otvorenje žičare bilo 06.04.2018. godine te da je isti dan bilo i dosta posjetioca. Pristup žičari zahtjeva pješaćenje i penjanje uz stepenice, te je sam pristup onemogućen osobama koje su u kolicima.

Zahtjevamo da se čim prije nađe rješenje te da se pristup žičari omogući i ovim osobama koje nisu u stanju stati na noge i popeti se uz značajan broj stepenica da bi sjeli i provozali se simbolom Grada Sarajeva.

Pozivam Gradonačelnika da se inicijativa realizuje u što kraćem roku, jer smo zaboravili na osobe koje ne smiju biti zaboravljene.“

O podnesenoj inicijativi se u svojoj diskusiji očitovao **Gradonačelnik Abdulah Skaka**.

4. **Gradski vijećnik Nuko Grebović** uputio je **inicijativu** u diskusiji koja je, između ostalog, imala sljedeći sadržaj.

“Košarkaški klub Željezničar u septembru ove godine organizira Međunarodni memorijalni turnir “Davorin Popović – Dačo”. To je 16-ti po redu međunarodni memorijalni turnir na kome će sudjelovati ekipe iz država bivše Jugoslavije i Turske. Inicijativa je da, budući da je KK Željezničar nositelj “Šestoaprilske nagrade Grada Sarajeva”, Gradsko vijeće i Gradonačelnik podrže organizaciju ovoga prestižnog turnira. Poznato je da se sport u Sarajevu nalazi u veoma teškoj situaciji, a pogotovo ženski sport. Ovaj klub se nalazi u teškoj situaciji, te je potrebno iskazati bojazan da se, bez gradske podrške neće moći organizirati ovaj bitan događaj za Grad Sarajevo. Zato se upućuje inicijativa Gradskom vijeću odnosno Gradonačelniku, da iznađu mogućnost i sredstva kako bi podržali ovaj turnir u visini od 12.000,00 KM. Predloženi iznos bi pokrio jednu trećinu troškova organizacije, a preostala sredstva će Klub osigurati na drugi način.“

5. **Gradski vijećnik Samir Fazlić** uputio je **inicijativu** u diskusiji koja je, između ostalog, imala sljedeći sadržaj.

Potrebno je da Gradonačelnik - Gradska služba za urbano planiranje, investicije, stambene i komunalne poslove, prezentira gradskim vijećnicima dokumentaciju kojom raspolaže kako bi se gradski vijećnici upoznali sa Regulacionim planom Gradski centar Marijin Dvor Kvadrant „B“, što je već bilo zatraženo prije godinu dana, a s ciljem osnovanog odlučivanja o budućim planskim rješenjima.

Očekuje se da Grad Sarajevo završi ranije započeti posao, odnosno konačno definiira planski dokument za ovaj izuzetno vrijedan centralni prostor, budući da je na snazi jedan plan koji je u koliziji sa zahtjevima građana, lokalne zajednice, ali i potencijalnih investitora.

Na prošloj sjednici Općinskog vijeća Centar, ovlašteni predlagač je odustao od prijedloga akta, upućenog Općinskom vijeću na razmatranje, a vezano za izgradnju podzemnih garaža na Bulevaru Franca Lehara.

U Općini Centar je u pripremi i odluka vezana za izgradnju određenih objekata na području Regulacionog plana Gradski centar Marijin Dvor u blizini Unisovih nebodera.

Također, još uvijek nije definiran koncept za izgradnju koncertne dvorane i biciklističke staze u okviru obuhvata ovog Plana.

6. **Gradski vijećnik Samir Fazlić** uputio je **inicijativu** u diskusiji koja je, između ostalog, imala sljedeći sadržaj.

Potrebno je da Gradsko vijeće do kraja tekuće godine, odnosno do početka EYOF 2019, na svakoj sjednici razmatra Informaciju o toku priprema za organizaciju i realizaciju EYOF.

Kao što je poznato, august mjesec je mjesec godišnjih odmora, a upitno je održavanje i sjednice Gradskog vijeća krajem septembra mjeseca zbog općih izbora koji će uslijediti.

Preostalo je, dakle, poslije toga, još nekoliko mjeseci do početka EYOF-a. Budući da su prisutne određene informacije da pripreme ne teku optimalnom dinamikom, potrebno je da se svi subjekti dodatno angažiraju kako bi se igre pripremile na odgovarajući način u potrebnom roku.

7. **Gradski vijećnik Samir Fazlić** uputio je **inicijativu** u diskusiji koja je, između ostalog, imala sljedeći sadržaj.

Potrebno je da Gradonačelnik – nadležne službe u Gradskoj upravi dostave odgovore na sva vijećnička pitanja upućena od početka mandata, odnosno daju informacije o toku realizacije podnesenih inicijativa ili se pismeno očituju o nemogućnosti njihove realizacije.

8. **Gradski vijećnik Nihad Uk** uputio je **inicijativu** u diskusiji koja je, između ostalog, imala sljedeći sadržaj.

Poznato je da je Grad Sarajevo u ranijem sazivu osnovao Ured za energetska efikasnost. Potrebno je informirati Gradsko vijeće o statusu, odnosno aktivnostima ovog Ureda, a s ciljem obnavljanja, odnosno intenziviranja njegovog rada obzirom na raspoložive potencijale u evropskim fondovima za dodjelu grantova u ovoj oblasti.

Potrebno je, posebno, razmotriti mogućnost apliciranja po pozivima za korištenje ovih sredstava, za realizaciju projekata obnove oštećenih fasada u gradu Sarajevu, a za što je moguće koristiti značajna sredstva.



**9. Gradski vijećnik Toni Vukadin** uputio je **inicijativu** u diskusiji koja je imala sljedeći sadržaj.

Upućuje se inicijativa da se ubuduće sjednice Gradskog vijeća započnu intoniranjem himne BiH, budući da je Sarajevo glavni grad BiH.

**10. Gradski vijećnik Toni Vukadin** uputio je **vijećničko pitanje** u diskusiji koja je imala sljedeći sadržaj.

Na službenoj internetskoj stranici EYOF, d.o.o. u desnom uglu se nalaze sljedeće skraćenice: BiH, SRB i ENG.

Potrebno je da rukovodstvo EYOF, d.o.o. Istočno Sarajevo, odgovori na pitanje šta tačno znače ove skraćenice.

\*\*\*

**Gradski vijećnik Vibor Handžić** je upoznao gradske vijećnike da je pripremio dvije inicijative i da će ih dostaviti u pisanom obliku kako bi se uštedilo vrijeme radi protokolarnih aktivnosti koje su uslijedile, što je i uradio, te se evidentiraju sljedeće inicijative kao inicijative podnesene na 18. sjednici Gradskog vijeća.

**11. Gradski vijećnik Vibor Handžić** uputio je **inicijativu** kako slijedi.

„Podnosim vijećničku inicijativu da Grad Sarajevo ispred zgrada i objekata na području Grada, koji se smatraju kulturno-historijski važnim i interesantnim, a koji su bili devastirani u toku protekle agresije, postavi obilježja koja će sadržavati fotografije tog objekta, zgrade iz perioda neposredno nakon rata – prije njegove sanacije, kao i tekst o samom objektu i njegovom kulturno-historijskom značaju.

Potrebno je da Gradonačelnik, u tom cilju, obrađenu i kompletiranu inicijativu uputi Komisiji za spomenike kako bi utvrdila prijedlog odluke ili odluka o postavljanju ovih spomen obilježja za Gradsko vijeće.

Obrazloženje:

Cilj jačanja ratnog turizma u našem gradu prije svega predstavlja podizanje svijesti o prošlosti našeg grada, njegovom historijskom značaju i značaju procesa njegove ponovne izgradnje. Primjer takve građevine jeste upravo naša Vijećnica, a sasvim je jasno da ih (nažalost) ima još mnogo. Smatram da bi se radilo o jako značajnom projektu, koji bi služio podizanju turističkog i historijskog značaja pojedinim lokacijama u gradu. Što se nabavke samih fotografija tiče, kao što znamo, mnogo je fotografa pratilo i obilježilo agresiju na ovaj grad, kao i sam proces podizanja Sarajeva iz pepela. Jedan od njih je i naš sugrađanin i dobitnik Šestoaprilske nagrade Grada Sarajeva Jim Marshall, čije su fotografije izložene u Historijskom muzeju BiH i dio su stalne postavke „15 godina Jima Marshalla“. Koncept ovog projekta zasnovan je na postizanju jakog „prije i poslije“ efekta, koji će osoba doživjeti pogledom na fotografiju, na kojem je objekat sa svim njegovim ratnim „ožiljcima“, a potom pogledom na objekat ispred sebe u trenutnom stanju.“

**12. Gradski vijećnik Vibor Handžića** uputio je **inicijativu** kako slijedi.

„ Podnosim inicijativu da Grad Sarajevo postavi spomen ploče na raskrsnici ulica Zmaja od Bosne i Nulte transverzale, u blizini Historijskog i Zemaljskog muzeja BiH, kojom će se obilježiti sjećanje na ubijene Selmu Agić i Editu Malkoč, te da Gradonačelnik, u tom cilju, obrađenu i kompletiranu inicijativu uputi Komisiji za spomenike kako bi utvrdila prijedlog odluke o postavljanju ove spomen ploče za Gradsko vijeće.

Obrazloženje:

Namjera inicijative je sasvim jasna - želja je da se obilježi sjećanje na njihove mlade živote i tragično stradanje. Bez daljeg obrazlaganja, želim samo napomenuti da se na ovoj lokaciji već nalazi improvizacija spomen ploče, koju su građani ovog grada prislonili na jedan od semafora na raskrsnici na kojoj se ubistvo desilo, što je dovoljan pokazatelj da je spomen obilježje poželjno i potrebno. Također bih podsjetio na to da je druga godišnjica njihove smrti 10. oktobra te bih ovom prilikom izrazio želju da, ukoliko inicijativa bude prihvaćena i bude započet proces njene realizacije, spomen ploča bude otkrivena na taj datum.“

\*\*\*

**Gradonačelnik Abdulah Skaka** je, zatim pozvao gradske vijećnike da, odmah po završetku sjednice, prisustvuju otkrivanju spomen ploče Hatidži Mehmedović na česmi u ulici Terzibašina broj jedan.

Također, pozvao je gradske vijećnike da prisustvuju obilježavanju 100 dana od otvaranje Trebevičke žičare tokom sutrašnjeg dana, a prema pozivu koji im je ranije upućen.

**Predsjedavajući Gradskog vijeća Igor Gavrić** je zatim zaključio rad 18. sjednice Gradskog vijeća Grada Sarajeva i najavio održavanje 19. sjednice Gradskog vijeća u srijedu, 26. 09. 2018. godine, a sjednice Kolegija Gradskog vijeća, u pripremi ove sjednice, za 04. 09. 2018. godine.

*Sjednica Gradskog vijeća Grada Sarajeva završena je u 11 sati i 56 minuta.*

Sastavni dio ovog zapisnika je izvornik i tonski snimak o radu Gradskog vijeća koji se čuvaju u Gradskoj službi za Gradsko vijeće.

**SEKRETAR GRADSKOG VIJEĆA**  
*Safet Krajišnik*

**PREDSJEDAVALJUĆI GRADSKOG VIJEĆA**  
*Dr. Igor Gavrić*